

棟  
亭  
詩  
別  
集

棟亭詩別集目錄

卷一

江行

錢塘曉潮

登燕子磯

秋日過訪芥公

登雞鳴寺

九月十五夜與阿蒙樸仙嘯亭酌月大醉兼

送樸仙明日渡江用少陵韻

初明調玉移居

寄姜綺季客江右

秋夜對月憶芥公

野田黃雀行

元宵醉後作

渡潞河題壁

聞恢復長沙誌喜四首

醉中書贈存存道者

櫻桃

西池

旅壁書感

喜雨紀事

紀夢寄孔天和

種蕉

瀛臺泛舟曲

奉使送桂花置潭柘竹亭下二首

宿西內寄懷范次丞

白塔曉望

弔亡

喜雨二首

哭馬伯和先生二首

登煙臺

飲酒四首

旋馬臺

龜趺山

流觴亭

光明殿

春日感懷二首

苔

籜

詠荷述事

戲用白  
戰體

送吳秋屏南歸

和桐初穀山署中寄懷原韻

五白詩

病霍

送胡進野之秦州

雨夕同古顏師作兼懷城南諸友

紡績娘

西苑霽四首

西苑夕三首

西苑晴二首

秋意二首

詠紅述事

曉鴉行

西苑晚出寄初明

圈虎

鹿苑朝獵歌

西山道上口占懷耦長

宿盧溝題壁

直宿左端

冰上打球詞三首

偶得木瓜二枚送橘圃三首

臘十六夜翫月偶讀茶村初明倡和詩寄懷

次原韻

讀次丞憶梅詞有感

臘夜折蠟梅置瓶中索調玉畫

與從兄子章飲燕市中

登喜峰城

送桐初南歸三首

霧行

踏青詞二首



詠花信廿四首

棟亭詩別集卷一

千山曹寅子清謨

江行

長江幻風煙渺渺千里秋波瀾無端倪茫動羣  
洲魚龍足芳夜鳬雁增新儔悠悠石頭城不見旌  
旗浮遙峰上朝暎鐘聲辨來舟緬企徵君宅遲我  
招提遊暢領白雲妙高卧繖山幽所歷爭一瞬踪  
跡焉可求茫茫鴻濛開排盪萬古愁苻堅一何愚  
投鞭思斷瀏高呼韓將軍橫空建長矛奇功雖不  
立已洗東南羞荒殘鐵甕城繁華古揚州英雄不

復作流光難暫留獨有杪高臺雲中結丹丘置酒  
良宴會慷慨發清謳飄飄挾飛仙皓月相與酬

錢塘曉潮

天雞叫側黃金盆青山澹澹浮一痕寒煙齊鎖西  
陵口丑雷爭擊鯨子門欲曉不曉風已滿孤檠焰  
冷春衣短伏枕心虛六合遊鳴鉦坐訝檣帆轉須  
臾廟中白馬出鮫珠四灑腥瑟瑟潛蛟貼伏不敢  
動黑雲有聲披以疾隆隆上騰一千尺萬壘鯨波  
將兩劈役使靈鼉令長吼倒驅衆峰走而逆北斗  
掉尾天失色渾茫之元不可測陰飈蕩盡還復生

赤光一線通中國揚舲竟指朱家渡云是當年驅  
馬處鐵甲無光水不飛誰人更遏鴟夷怒君不見  
白蘋茫茫啼鷓鴣西方之月魄已徂冬青之樹猶  
扶疎

登燕子磯

吳楚設天塹峭壁爲之門飛煙自上下怒潮噬其  
根艤艫剪江來風力厚且屯一入吞吐中屹然不  
可捫遂令山氣壯蔭彼神州尊淹蹇十年後連巔  
跨兵垣雲濤忽自靜杉檣無復存芳洲徧蘆荻租  
稅及魚豚仰念齊梁人負此白日溫流風日以遠

貨殖母乃繁東上萬里亭四望絕攀援惟托山水  
音一寫中心煩

秋日過訪芥公

積水遶孤寺高僧終日閒定香浮上座霽色破前  
山得句聞敲鉢逃禪媿閉關茶瓜清話久吾意竟  
忘還

登雞鳴寺

我愛齊梁之古寺每探遺跡一登臨城連蔓草寒  
雲換塔湧荒江佛火沉秋色豈知興廢久鐘聲時  
覺喜悲深浮生回首真堪悟日暮憑欄不盡吟

九月十五夜與阿蒙樸仙嘯亭酌月大醉

兼送樸仙明日渡江用少陵韻

紫薇花下漏聲清月氣東來烏鵲驚脫帽寧輸他  
夕醉勸君休抱不平鳴樽前流水期吾輩天上浮  
雲寄別情若到故園秋草在寒潮應念石頭城

初明調玉移居

季子能貧道氣矜移家歲晚興相仍啓扉遠映寒  
山雪覓井先敲古澗冰牆過濁醪原舊侶砌移疎  
竹自鄰僧力葵負米經營外又與諸昆共一燈

寄姜綺季客江右

樹外寒山淡欲無一樽聊復對平蕪布帆暗轉金  
焦岸朔雁新遲彭蠡湖九日籬花猶寂寞六朝粉  
本漸模糊憑誰更寄數行字力索匡廬墨翠圖

秋夜對月憶芥公

羣息月留景高館露華涼投趣向永夜晚風聞衆  
芳開軒暢花氣冰彩明衣裳草堂入虛白四顧秋  
茫茫孤鴻叫中野百蟲奏清商如見山之深萬類  
耿孤光其中念幽人林壑潛青蒼鬚眉存古道瓢  
笠隱行藏至言猶在耳別來見新霜因風寄遐抱  
安得凌空翔

野田黃雀行

野田有黃雀具體亦甚微決起榆枋間顧盼生光  
輝遊子利其羽挾彈隨飛飛飛入叢樾棘刺牽  
人衣釋弓成一款物理晤忘機微禽據險阻大人  
屈其威身外有餘地飲啄無是非

元宵醉後作

梅花隔座月來遲愁裏聞歌是別離無奈冰絃聲  
欲斷春風吹面酒醒時

渡潞河題壁

水流沙闊岸無塵策馬東來此問津楊柳青青隔



春浦晚風愁殺渡河人

聞恢復長沙誌喜四首

捷奏湖南至長安二月初將軍敬拜表

天子喜披書廟算無遺失妖氛快掃除日高開彩  
仗春色滿皇居

七載經烽火強兵怯戰場鐵衣包白骨寶馬載紅  
妝筋力疲吳越精魂泣漢湘太平當此日 聖德

自遐昌

不待桃花水揚舲過洞庭黃旗明大野白羽積飛  
星雀舫空沉泊鳶梯莫暫傳三苗誅首惡傳檄楚

疆寧

破險寇無據攻心內亂因天威非屈楚神武始全  
秦竹帛光新烈桐圭著舊親渡江還接戰追看錦  
城春

吳逆死衡州孫世蕃載屍入滇大  
兵已收湖南二月初七日捷至

醉中書贈存存道者

春日開軒坐悠然興超越花外有來人鳥聲猶未  
歇出門一執手清嘯入林樾知君愛我真不厭頻  
來謁顧此尊中酒能無高興發濁醪竟沉飲隨意  
飽蔬蕨精求太上理谷神空忽忽哀茲飽暖身佳  
景多汨沒何如對幽人醉臥披綠髮及暮春風生

莫愁石路滑幽燈共倚樹四座香恍惚

櫻桃

上苑新芳供御廚承恩賜出絳宮珠風吹杏酪嘗  
初暖日映瑛盤看欲無紅到十分春始去香餘一  
滴齒皆蘇柏梁每羨東方朔七字吟成興倍殊

西池

曉風吹動木蘭橈兩岸無人過板橋幾日不來春  
水闊滿河葦葉雨蕭蕭

旅壁書感

十年勝事不知悲日暮尋愁坐屢移最惜江南呼

酒處柳花如雪聽鶯時

喜雨紀事

兵興六載朝野貧吳楚千里無青春瘡痍未合百  
姓餓春來況復無甘霖維夏之吉日尚紅 天子  
沐浴乾清宮齋心三日居左箇鸞車翠扇來向東  
玉漏初終殘月好絲鞭三聲風滿道萬人屏氣絳  
氍開珠冕繡裳雲浩浩 帝曰咨我黎元苦糊口  
無資急官府敢告上天降霖雨淨洗甲兵茂禾黍  
司空載命築天壇 至尊徒步忘朝餐輕煙擁蓋  
上九級再拜三拜飛颺寒焚香畢祝御衣溼雷電

皆至天下歡迴鑾千官呼萬壽殿中賜衣兼勞酒  
粵西同日報歸平眼見妖氛靖林藪西江稅免二  
百萬近日江南米賤否吾儕飽暖逢太平甞勉加  
餐力畎畝

紀夢寄孔天和

好書讀不盡掩卷聽鳴雞愁心向春雨夜夢連青  
谿青谿多楊柳枝上盡黃鸝和風送柔音葉底開  
重閨如聞故人語不見廐馬嘶人生歡樂處獨往  
神悽悽何況久別離天外成孤棲披衣起中宵嘔  
焉念同綈

種蕉

晨興課僮僕移蕉自南林栽培得疎雨清響如不  
禁主人何所爲散髮開胸襟靜翫綠葉展不知庭  
戶深

瀛臺泛舟曲

金門玉戶連雲裏週迴弱水三千里自是凡人望  
眼迷不見瀛臺見海水海水悠悠蕩碧空荷葉荷  
花相映紅天橋千丈不敢渡只聞笙笛吹涼風薄  
暮龍舟出東省彩旗畫槳浮清影打鼓一聲潮水  
平白雲隔斷波光靜射魚初罷釣天起柳外驂騑

驕不已寶盞交酬縹渺間西山落日胭脂紫

奉使送桂花置潭柘竹亭下二首

桂子生南國移來秋滿亭天香吹不斷山露洗還  
青過嶺雲虛護開門月正停明朝期駐蹕枝上  
挂金鈴

驚嶺通天闕風光到轉遲佛泉聲寂寞仙竹影離  
披一雨添秋色千崖供御墀長安臨咫尺招隱此  
君宜

宿西內寄懷范次丞

西院梧桐入暮愁遙憐作客苦淹留秋光滿眼歸

何處一夜長河拍枕流

白塔曉望

涼風渡河來吹我頭上冠  
褰裳旣不早獨立良已  
難步履何嶮崎笑語憑危欄  
神曠體亦輕花明春  
正寒人煙淡杳靄霽色迷  
巒岼塞山忽倒景積翠  
如流丹 皇都煥宏麗天闕森琅玕  
晴波金碧外  
疎柳雲霞端  
軒車塞虹橋  
沙堤列壺簞  
遠媿璠璣  
姿遊覽多清歡  
五鼎不以奉而愛  
垂一竿風塵令  
人老終日竟忘餐  
會當謝奔走逍遙詠考槃

弔亡



枯桐鑿琴鳳凰老鴛鴦冢上生秋草地傷心人  
不知綠蘿紫竹愁天曉清霜九月侵羅衣血淚灑  
作紅冰飛蘭椒桂酒爲君薦滿地白雲何處歸

喜雨

小雨亦可喜霏霏巷陌邊霑衣不成潤著草自添  
妍但使浮塵淨須知淚眼懸幾回凝遠睇散步詠  
涼天

漸暮聞涓滴春光向此歸綠迷三里霧清閉一城  
扉弄水兒皆去荷鋤人欲稀東南應有望地下土  
膏肥

哭馬伯和先生二首

五十飄零霜鬢侵舊時顏色杳難尋  
魂歸故國青山晚夢遶楓林  
白雪深幾見文章甘沒齒誰知蒙  
難苦傷心而今更有遺詩在讀向天南  
淚滿襟憶昔提攜童穉年追歡多在小池邊  
義熙老盡江門柳姑熟新添枯隴煙  
天地以私貧一老烽煙何日返山川  
忍聞風雨秦淮上六尺孤兒守舊壇

登煙臺

老樹千崖曉驚沙一夜風人登戍樓望馬過戰場  
空海氣蒼茫白春陰寂寞紅京華瞻咫尺初日正

曠曠

飲酒四首

羲和馭六轡流景不暫停借問天上人胡爲亦勞  
生陰陽任裏運繩墨無重輕纔見塞山雪忽已芳  
甸晴榮枯付游戲末路難爲行勸君一杯酒曠達  
萬古情

丹砂化黃金志士鄙不爲安得釀美酒痛飲無死  
期悠悠百年內苦樂常相違顧此金與紫嗟彼藿  
與藜願我甘澹泊終老竟忘疲

明月照春河輕風揚其波臨流會心遠對酒爭歡

多新聲只一奏妙舞更婆娑俯仰天地間今古將如何

四時各代謝興廢無日無怡然置肥遯又不履危途何苦杯中物而甘門外筭人生貴自足所獲良不誣

### 旋馬臺

晚風吹樹動蒼涼攬轡當時撫八荒輦跡不知春草綠人衣空染菜花香蛟螭勢屈皆迷眼鶯燕聲酣總斷腸惟有多情北山色翠屏依舊映西廊

### 龜趺山

巉崖峭壁自玲瓏夜半甘泉事已空  
碧樹下陰千尺地綺窗虛受四邊風  
依稀燕子殘春冷寂寞桃花夕照紅  
一曲緜笙人跨雀空餘禾黍怨離宮

流觴亭

轆轤銀瓶金井西清流曲沼泛玻璃  
持觴曾慶千秋酒跋燭還驚午夜雞  
翠瓦影虛風浩浩銅鈴聲澀雨淒淒  
凋零此日傷遊冶枝上寒烏莫更啼

光明殿

聞道前朝清淨居白頭宮監語欹欹  
英雄力結金縢誓神鬼靈迴玉匣書  
雲擁旌旗還動蕩月明簪

珮自森疎諸天不動調元化惆悵丹砂事總虛

春日感懷二首

簷外微霜拂柳條行春昨已過花朝迎風簷簷陰  
嗚咽垂野星河自動搖佇立每從愁處久閒情多  
向酒邊消年來更覺休文瘦檢點軒前有藥苗  
一年花事喜春晴却到花時百感生零亂故園飄  
豔雪叮嚀新樹訴流鶯傷心人醒揚州夢落日風  
吹易水城千古淒涼只如此繁華原亦累多情

苔

欲襯殘紅送晚春浣紗何處更愁人鬢髮已禿江

淹筆點染偏欺原憲貧幾惜餘香隨步冷一經連  
雨上堦新等閒自笑誰離戶賴爾牆東障遠塵

籜

紫粉初乾碧玉齊重來幽徑感雲泥紛披忍逐驚  
風葉撲啄時聞曝翅難漫倚細香沾翠袖不堪清  
吹伴征顰素冠脫罷頻搔首深悔當時渡剡溪

詠荷述事

戲用白  
戰體

出水憐新雨凌波笑晚涼自然塵不染無那種能  
香半面妝初露多心影故藏浣紗非越女盪槳是  
吳娘幽隱通銀臂分明捲翠裳游來魚比目飛去

鳥鴛鴦塘上行人少堤前蕩子狂秋風一蕭瑟日  
日守空房

送吳秋屏南歸

長安一雁一歸心何限滄波與暮岑寄語搖鞭吳  
季重拂塵休向舊牆陰

和桐初穀山署中寄懷原韻

朱夏盛炎燠客懷雜悲喜望雲眼已穿剖鯉心先  
擬開心讀素書目擊存深旨故人憐我瘦三載隔  
烽壘空求豫章材未弔湘江芷懜騰天地中潦倒  
干戈裏游詠盈篇章愁積何時已嗟予歸故鄉索



居近一紀蕭條金臺樹決潁渾河水輪蹄白日逐  
稅駕安所止勞生多一官神交寄千里悠悠汶上  
人不見征塵起

五白詩

玉簪

綠油經雨重玉色倚風涼耐可餘香豔惟宜侍女  
妝

梔子

本自揚州重濃芬徧水涯晚涼輕剪玉心擬合歡  
花

采蘩

亦名  
抹麗

抹麗應愁熱柔脂不忍簪輕颺恣小吹半夜展疎襟

粉團

碧蔓森紅刺窺鄰引蝶飛蛾眉微有妬不恨太真肥

水仙

未如湘女豔翻覺洛神貧獨抱中黃氣還同入道人

病雀

白雀翔高天不受絆與羈有時息毛羽終焉觸藩  
籬哀鳴爾何爲縱步不能移聲隨霜月苦身被秋  
風欺固知江海心況乃雲霞姿忍饑已倔強延頸  
還高窺縞裳污塵土朱冠暗臙脂雖曰神色喪未  
覺品格卑亭亭空庭內君子爲之悲

送胡進野之秦州

南風吹荔葉向客作秋聲聚散知何極淒涼空復  
情酒人辭易水柳色到西京日暮平原上長歌涕  
淚橫

雨夕同古顏師作兼懷城南諸友

秋色欲無際碧陰生夕涼溼雲猶戀水細雨謾焚  
香思入空濛裏愁應涓滴量未知嵇阮輩能否縱  
清狂

紡績娘

最惜青衿短侵晨出小籬柔枝綠露體雜蕊飽涼  
吹莫爲秋糧足寧知夜火遲清吟蕭索後辛苦伴  
書帷

西苑霽四首

波影漾虹蜺紅橋綠正淒畫橈停泊處一片蘂雞  
啼

紫閣風初滿  
西山澹欲無  
藕花香不斷  
柳外見澄湖

白鳥劃煙去  
綠簑衝雨來  
釣絲明滅裏  
知是錦帆開

輕霞低壓樹  
霽景遠臨扉  
人語秋煙靜  
魚跳夜火微

西苑夕三首

葦花瑟瑟連空碧  
白鳥銜魚去復來  
一抹玻璃吹不起  
紅雲影裏見樓臺

荷香冉冉覺舟行  
疎柳微茫浥露清  
待得月痕剛

半夜不知何處玉簫聲

流水行雲無定踪芙蓉漏盡一聲鐘  
自慙退食從容慣幾處紅橋煙雨逢

西苑晴二首

晴光照疎樹爽氣滿西樓斷嶺煙猶暗  
寒波淨不流採菱聞遠曲撥棹動潛鉤  
漸覺芙蕖老紅衣處處秋

鳥語涼陰外魚吹紫蓼傍高天下空碧  
野岸冷疎香秋色二千里歸鴻三五行  
遲遲故園信悽惻憶縫裳

秋意

竹露聞清響  
桐陰掩月華  
歡來如不見  
手弄紫薇花

華燭落金爐  
沉香生碧煙  
花開最涼夜  
人困似春天

詠紅述事

誰將杜鵑血  
灑作曉霜天  
客愛停車看  
人悲仗節寒  
昔年曾下淚  
今日怯題箋  
寶炬煙銷盡  
金爐炭未殘  
小窗通日影  
叢杏雜煙燃  
睡久猶沾頰  
羞多自倚欄  
愛拈吳線細  
笑潤蜀絲乾  
一點偏當額  
丹

砂競搗丸彈箏銀甲染刺背  
圓蓮匣魚腸躍  
龍沙汗馬盤相思南國滿擬化赤城仙

曉鴉行

霜林颯颯鴉蔽天朝陽接翅相茹連已驚宮漏破  
幽夢還過仙仗共迴旋迴旋側塞青冥路倚風結  
陣衝寒霧逐隊誰爲捷徑飛引雛只見回頭顧日  
曬野田紅稻香四郊人靜聞打場曉餐午飯夕歸  
去羞殺慈烏哺道傍

西苑晚出寄初明

掖垣疎樹隱宮橋蘆鴨晴喧上晚潮紫靄半湖霞



色冷碧空千里雁行高欣逢聖代多佳日愛得身  
閒逐下僚最是天涯松菊老北山猿雀夢迢迢

圈虎

危機忌一踏密網結千層困極聲猶厲耽餘氣忽  
騰陰風枯壁樹斜日射池冰藜食同供急應慙上  
苑鷹

鹿苑朝獵歌

紅霞冠日清風生千峰凝翠森相迎黃塵忽分雁  
羣遠平郊正曉晴無聲千乘萬騎從東來旗奮馬  
怒弓正開選肥擇肉心合手空皮摧翮真良材豺

狼滅跡 天顏喜計能賞巧山呼裏上林長楊何  
足期草茅願獻車攻詩

西山道上口占懷耦長

落日散餘陰晴山澹相倚歸鞭不惜遲幽懷自難  
已野空人語寒風靜羣鷗起回首紅塵中心孤碧  
雲裏

宿盧溝題壁

秋風蕩秋水蘆花沾客衣冥濛歲月老旅泊身所  
稀薄餐不及飽清夢隨波飛十年馬上兒門戶生  
光輝明朝挾弓矢應射白狼歸

直宿左端

玉鐸振初夜繁星燦碧天漏凝宮燭短霜警劒花  
鮮寂寂烏臺樹冥冥紫禁煙擁貂正無寐心怯五  
湖邊

冰上打球詞三首

青靴窄窄虎牙纏豹脊雙分小隊圓整結一齊偷  
著眼綵團飛下白雲邊

萬頃龍池一鏡平旗門迥出寂無聲爭先坐獲如  
風掠殿後飛迎似燕輕

開疆爭捷論功多綠釀葡萄金叵羅自是勤勞防

逸樂西南兵甲漸消磨

偶得木瓜二枚送橘圃三首

清香只合疎梅伴句愛新城逸興多今日南金托

相贈等閒瓊報擬如何

留伴疎梅小雪前王阮亭贈耦長木瓜句也

箬籠新包小雪前西園載酒一林煙開緘已許疎襟透豈惜常年損俸錢

寒芬出袖頗宜人却笑貧無珠辟塵諒好不勞增竹杖綠窗深鎖覆紅巾

臘十六夜翫月偶讀茶村初明倡和詩寄

懷次原韻

月知今夕老皎皎出江門詩與清輝苦交憑夢寐  
敦風流開幕府倔強卧雲根五字真強敵天涯悵  
舉樽

讀次丞憶梅詞有感

官閣梅花幾發枝頻歌紅豆怯相思從知小范無  
豪興不記秋風飲淚時

范文正有酒入愁腸化作相思淚之句因憶賦別托此

臘夜折蠟梅置瓶中索調玉畫

乍離煙火未知春折向青陽解笑人風勒金鈴私  
譯語雪侵鴉額勝簪銀和鹽自擬調新水貯屋終  
須遠市塵怪是羅浮錯消息綠窗呵筆對傳神

與從兄子章飲燕市中

野岸綠猶澀市橋冰已開  
歸鴻不成序更逐東風  
來寂寞一杯酒消磨萬古才  
短歌送春日步遶黃  
金臺

登喜峰城

三十年來戰伐餘一城  
山色晚煙初白鹽赤米飽  
亦足碧草黃花春晏如  
石戍火寒投野鴿隴頭沙  
淺渡樵車貂裘自顧增羞澀  
明月天涯有敝廬

送桐初南歸三首

江南野客倦京華  
秋色先嚴易水車  
擊筑竟無歌

哭地一杯同醉麗人家

菡萏香中賦別離新詞畢竟讓烏絲

其年賦滿江紅送之烏絲其辭名也

雨收督亢天全綠恰是詩人策馬時

年年待獵出回中憔悴文園短鬢蓬近日浣花無

恙否爲子傳語到江東

桐初爲杜茶村佳壻

霧行

霖霖霑衣雨不殊荒岡松火爨樵蘇西風正起卻

東去啼煞一林青鵲鵠

踏青詞二首

城內春河城外流綠楊夾岸水悠悠儂家舊在江

南住只到春來多少愁

逐日尋春不見春馬啼風急起香塵可憐女伴相逢問盡是長征怨別人

詠花信廿四首

梅花

荒山野水夢能好東閣孤山句強裁獨有吉祥橫古幹春風先肯隔年來

水仙

夕窗明瑩不容塵白石寒泉供此身一派青陽消未得夜香深護讀書人



山茶

臨風密葉碧琅玕也抵千金帶笑看爭似王孫茅  
屋畔垂垂兩樹寶珠團

瑞香

潭柘寺裏錦邊花年年瑣碎剪寒霞東風不許遊  
客醉細雨送歸油壁車

蘭花

紅蘭浥露曉光疎翠幔珠簾氣未舒只恐檀心渾  
盡吐欲分秀色上綳裾

山礬

婆娑自比小山桂寂寞甘同苦行僧爲念幽香傳  
七里他年高屐度層冰

迎春

野園春近欲編籬遮莫青青柳色垂忽訝金衣盡  
零碎箇中消息野人知

櫻桃花

軟紅爭映水晶鉤曾植三株傍小樓豈是桃花貪  
結子錦囊詩句太風流

辛夷

日暖西園紫玉肥香飄南陌黃蜂飛花前舉酒不

復飲花下少年何處歸

杏花

迢遞河橋傍酒帘胭脂一片溼廉纖馬蹄笑踏軟  
塵去媿我半生烏帽欄

玉蘭

輕雲淡日逞精神舊跡招提夢不真香雪堂前開  
一月坐中誰念詠花人

李花

說與春陽費剪裁無窮碎玉倚風來郁黃鄭紫天  
家味乞得賢鄰十五栽

小園近上果園去歲乞十五  
株植西窗下李郁鄭二姓者佳

桃花

漁郎去後雨濛濛從此仙源路不通  
一夜春風十千樹人間悵望早霞紅

菜花

轆轤汲井四畦香老圃醉眠春晝長  
舊內風流一朝盡踏歌歸來衣染黃

海棠

垂鬟無語弄羅裾十六不足十四餘  
紅粉當天正三月西鄰渴極馬相如

梨花

浪傳玉雨徧瀛洲已是淒清鳳子遊  
斷送一生常是淚洗妝難破馬嵬愁

棣花

多年寄跡小籬邊細蕊金苞慣得憐  
不爲此花能耐久繁華閱盡豔陽天

桐花

開時初見葉相當一徑風搖細細香  
待得清陰思結夏且來掃地布匡牀

柳花

顛狂故意著天飛飄泊還依錦幙圍  
自入清池迥

無跡一天風浪幾時歸

麥花

秧泥活活水車翻碧浪鱗鱗河上原吹盡輕黃無  
處見須知八口負朝暄

薔薇

猩紅一點逗青條撩撥春愁轉寂寥但使芳塵化  
香雨牆頭日日弄嬌嬈

牡丹

天香不共曉風還錦繡叢中春自然留取一枝酬  
彩筆笙歌徹夜畫欄前

醪醪

醪醪花發玉醅清  
裊娜無端若有情  
更摘櫻桃向  
風立濃香消受露盈盈

唐時用醪醪酒  
雜櫻桃賜宴

杜鵑花

樹頭樹底紅初盡  
枝上啼紅花又開  
羈客有家歸  
不得五更春夢枕邊來

棟亭詩別集目錄

卷二

賓及二兄招飲時值宿未赴悵然踏月口占

兼示子猷二首

冲谷四兄歸溲陽予從獵湯泉同行不相見

十三日禁中見月感賦兼呈二兄

長安中秋四首

過甘園

再遊功德寺

羅文峪



淒惶嶺

送陶奉長還長沙

過亦園望西山作

坐月憶調玉

九月送荆閬公桐初調玉同賦

雨夜有感兼寄江南諸子二首

遊大花園漫題二首

後陶進野不至復作一首

集西堂看菊與潛菴黃理進野分韻得豪字

兼懷桐初

再送汪上若

訪學陶不遇題壁

雪晴踏月歸西堂二首

木孩至題一捷句

人日集飲

用人字

元夜集西堂

用歡字

夜泛湖至董氏園登閣和子猷二首

撫事爲詩復戲成二斷句

庭前納涼讀鑾江倡和詩有題二首

題錫山蔣氏酒樓

涼語

恒河

恒河在濕河之北水冽而深嶺環之中有人家雞犬肥馴黍稷在場解鞍坐息其側陶然有餘樂也因悲世路之險嗟行

役之苦遂賦此篇

以期異日云爾

題來崔亭園

爲石廩內兄賦

暮遊弘濟寺石壁回宿觀音閣中

村居二首

題畫三首

旅壁讀阮亭渡易水詩且述牧齋西樵句感

賦

讀顧文饒洞庭龍女詩戲題其後

送舒康伯南歸

馬上望戒壇次耦長韻

榴花

殘榴

臘月十六日過南城留飲

宿金氏園亭

喜吳調玉至

憶芥公上人二首

期葉桐初不至

哭陳其年檢討

見雁懷馬伯和

春日軒下種秋花

放愁詩

棟亭留別

夜雨和葉桐初

送袁士旦遊吳下二首

雪霽

自潤州至吳門行將北歸杜些山程令彰作

詩見寄奉和二首

出隱園小亭復題一首

聞蛩感題二首

青杏況梅有感之作三首

西堂集諸同人限薰風南來四字四首

微雨窗蕉綠甚漫成二首

和吳雪篷塞上四無詩

汪上若程勁飛過訪野航自天津初歸

送鮑子韶赴粵東將軍幕

子猷摘諸葛菜感題二捷句

哭醉行

爲蘿山哭  
勁飛作

病中冲谷四兄寄詩相慰信筆奉荅兼感兩

亡兄四首

熱甚潘雪帆見枉

禹尚基卜居圖索題

西村師教子導引却病戲成二詩時師將歸  
清涼

棟亭詩別集卷二

千山曹寅子清謨

賓及二兄招飲時值宿未赴悵然踏月口

占兼示子猷二首

歸鴉自知夕掖樹更遲煙耐可一樽外徘徊雙闕  
前靜香週月地清響結冰天料及圍爐坐馳思執  
戟邊

清談舒沃愛瀟灑對賓時骨肉應何似歡呼自不  
支已能揮短塵還共校新詩却笑今宵夢先輸春  
草池



冲谷四兄歸溷陽予從獵湯泉同行不相

見十三日禁中見月感賦兼呈二兄

西河衰柳蕭蕭月半照龍旗出曉空別恨不容霜  
鏡滿短蓬又見玉梳工香凝畫省眠饑鳳夢隔寒  
雲數斷鴻爭似蘋婆雙院裏揮毫日日醉春風

長安中秋四首

夜入豐隆樹波搖太液香人煙九點淨仙桂一輪  
黃酒浴紅鸚鵡風移金鳳凰百年今夜醉玉漏正  
初長

漠漠秋塵外歸來更倚闌衣香宮隊散燈暈市樓

驩疎柳眠應足征鴻陣亦寒如何數行字親切報平安

月華寂如水綠氣運鴻濛萬戶砧初動三邊火不紅銀河波自淺烏雀影沈空浩蕩人間思無端回首中

玉笛凌颼發悠悠天上浮下方皆側耳明月獨登樓露老鮫宮閉煙清海市收此時悲令序相與惜清秋

過甘園

依然薜荔舊牆陰再拜河陽松柏林一二年間春

更好八千里外恨難沉

總制公死  
難滇南

峻嶒石筍穿窗見狼

藉風花遶地尋已是杜鵑啼不盡忍教司馬重沾

襟

謂鴻舒  
表兄

### 再遊功德寺

仍是耽吟善病身重來浮地覓殘春蕭森一雨全  
飛燕岑寂雙扉不見人頓撫垂楊生浩歎轉憐流  
水入罌塵招提昔日猶今日珍重西陵舊比鄰

### 羅文峪

軟草晴雲舞碧雞自磨銀鏃刃雙齊九門一出秋  
無礙回首斜陽萬馬蹄

悽惶嶺

出谷入谷日已昏  
寒潮汨沒打關門  
當年客戍腸皆斷  
此日龍旗百萬屯

送陶奉長還長沙

不見海榴紅照眼  
翻驚萬里泛歸槎  
燕臺燕市全非古  
湘草湘雲自有家  
五月江濤新戰水  
百年籬落舊栽花  
懸知更在羲皇上  
寄語梁園客漫譁

過亦園望西山作

名園佳水易斜曛  
錦憶斑駁笑語紛  
不道碧峻常淡掃  
一層疎柳一層雲

坐月憶調玉

離別何關月清光似惜予悠然出林表索爾入窗  
虛顧影遙分席焚香靜掩書思君最初夜何處倚  
村閭

九月送荆閬公桐初調玉同賦

潦倒髯公意氣豪只教五斗勸葡萄寒城月上一  
聲鼓卧榻水橫三尺刀正欲狂吟愁病肺好將山  
色戀綈袍此身未老君強飯明日北風天更高

雨夜有感兼寄江南諸子二首

殘春猶矍鑠野客盡飄零櫻筍憐微病糟醅懼獨

醒衆雲披雁陣急雨占鷗汀憶爾西河柳應添幾  
尺青

故國惟楊柳他鄉有竹林往來南北夢斟酌古今  
心戶任春風閉燈宜夜雨深天涯誰更健聊復慰  
愁吟

遊大花園漫題二首

鞍馬清郊近樓臺曠野尊好風皆倚樹流水正當  
門舞雀乘軒過涼猿抱石蹲羣生漫容與十日更  
留髡

蒲柳陰無隙銀沙幾曲通酷香頻詫騎禿袖獨凌

空日側青帘上禽啼碧瓦中遙憐放船者指顧說璇宮

後陶進野不至復作一首

逸興登高盡餘酣枕碧流影雖慙鷺品心已覺魚  
秋白眼從天放紅塵爲客浮勞勞二三子何事苦  
淹留

集西堂看菊與潛菴黃理進野分韻得豪  
字兼懷桐初

莫使蓴鱸客夢勞且因殘菊醉寒曹不求甚解詩  
偏妙只可自娛燈共挑行役又傳西塞馬相思終

滯楚江舫浮沉爾我何堪說索向秋窗詠寶刀

再送汪上若

蘭畹金荃自有神旣羞彈鋏豈憂貧冷雲不避堦

前月熱酒重澆畫裏人

有燈月酒人圓圖

車馬漫留千里駕

衣冠皆負五湖尊廣陵到日潮應凍記遣飛鴻向水濱

訪學陶不遇題壁

蕭疎殘菊見秋心幾度推簾問碧岑可耐北風鴉  
隊裏催人紅燭下城陰

雪晴踏月歸西堂二首



乍闔天閭烏未栖朦朧霽色樹全迷沙堤好讓籠  
燈去自愛銀塵送馬蹄

萬戶千門月上時能將多少異茅茨銷沉意氣頻  
來往說向梅花恐不知

木孩至題一捷句

衝寒一騎勝吳舳取醉西鄰有濁醪見說暮雲雙  
闕裏夕陽岑寂萬鴉高

人日集飲

用人字

綠萼吐芳春銀幡給酒人一晴占甲子百罰守庚  
申歲俗隨時好盤餐愛客真漫教愁耳熱腰鼓過

街頻

元夜集西堂

用敬字

三寸黃柑照玉盤  
玲瓏寶炬遶雕欄  
茫茫簪舄春何限  
滾滾魚龍夜未安  
火霧噴空消宿酒  
花枝賣眼闌  
新歡堯時甲子秦時月  
好爲浮生著意看

夜泛湖至董氏園登閣和子猷二首

野釀醉還醒  
山樓坐處高  
燭涼秋葉翠  
天靜早雞號  
亦有宵行樂  
休辭鞅掌勞  
暫歸期蠟屐  
一月興猶豪

湖水泱泱白湖帆片片秋軒窗真不俗  
鷗鷺信同

儔畫法身前得秋光淡處收  
凌晨加盥漱染翰倚岑樓

撫事爲詩復戲成二斷句

老僧養花如惜兒數葉分頭也  
自奇滿院秋山無點綴西風殘  
照亂胭脂

昂宵絳幘五更頭只怕濃霜爛  
不收細雨閒窗憐舊句誰知草  
木替人愁

庭前納涼讀鑾江倡和詩有題二首

閉門自覓玄真子何處雲山杜  
德機一夜涼風吹白苧幾人失  
却綠簑衣

分明草際孤螢尾笑指漁燈宿白沙夢裏匡廬誰  
著眼野航天際竟還家

題錫山蔣氏酒樓

秋樹晴河一里煙朝來洗漱盡名泉買田陽羨應  
猶過此處樓居即是仙

涼語

銀牀夜汲聲丁東月波淡布星朦朧柳飄屋角西  
南風移牀拂簟庭當中綵巾安匜簾下櫳何以燕  
息如弛弓離離白影搖方空眠音漸純無夢通百  
八撞打高城鐘曉來啓戶尋涼蹤土囊括口力已

窮我家颯沓雙梧桐山妻椎髻笑整容赤脚歷碌  
與此同鼓粥飯氣和薑蔥先生擁鼻呼阿儂奴子  
奏伎非凡庸我歌汝和相始終

恒河

恒河在灤河之北水冽而深嶺環之中有人家雞犬肥  
馴黍稷在場解鞍坐息其側陶然有餘樂也因悲世路

之險嗟行役之苦遂賦  
此篇以期異日云爾

五年不夢長江水胸中忽作波濤起攬盡悠悠一  
片心誰憐棄置風塵裏今夜天涯何處歸三屯塞  
上行人稀馬疲道遠日投嶺解鞍枵腹風吹衣西  
辭金闕在雲表東瞻山海多旌旗茫茫春色散平  
野仄峰直走長河下荒雞三唱櫟林深炊煙一片

浮千瓦借問此鄉俗如何癭頸廣額語字訛銀釵  
土蝕野花澀顧我兩鬢青婆娑此去漁陽三百里  
邊垣落照胭脂紫恐是秦時避世人荒原別復開  
墟市款塞穹廬星散居雕弓吹火射飛魚及時立  
業苦不早牙旗金角光門閭何當買此百繩地還  
如谷口人號愚朝看晴霞漾疎翠夜弄素月凌清  
虛

題來崔亭圖

爲石廩  
內兄賦

李君話崔雙淚垂命子更作來崔詩禽鳥得氣義  
如此側死橫生空爾爲徘徊不得意翻身歸故園

園中二子抱崔泣遂以此崔名其軒古時感恩崔  
最少徐家哭弔丁家老今世應慙有此禽攜歸莫  
傍長安道余家紫棟搖天風婆娑畧與此崔同錦  
衣再拜傷局促往往疾首呼蒼穹此樹安能青萬  
載君家崔亦磨人代嗚呼人代磨滅今不可期幸  
勿折我棟樹枝請君縱崔向空去泱泱白雲無盡  
時

暮遊弘濟寺石壁回宿觀音閣中

羈身嬰世網高興久淹積此行抱奇懷遙見一片  
石浮光逐清景蕩漾欣所適逼近覺水低仰望礙

飛翮天風豁疎翠韁韉潮聲發耽奇竟忘險興激  
凌蒼壁迴巒隱別峰鳥道貫罅隙接手上巉崖宛  
轉幾千尺杳冥人語洪空洞聞水脉草木潛幽光  
煙霞無定跡極巔險忽平來路雲已隔返照射空  
江波濤溷金碧覩茲移我情頓覺煩塵釋下方暮  
鐘動急轉心促迫向南得微徑盤折不容屐溪水  
自澄鮮藤花青可惜鐵鑊懸一樓虛敞戶常闢冷  
風吹我面颯颯動毛髮中有百歲僧誦經不下席  
舉手招我言此中足休息

村居二首



懷抱萬古歡精默免榮辱豈無江海心隨時聊自  
足年華亦已警寓目皆吾屬散髮坐疎林遙山入  
空綠

俗客不入山春光向幽獨驅童力畎畝日暮閒林  
麓雪溜冷涓涓野花開石屋經營無我心茗香睡  
方熟

題畫三首

崖前樹色不知老溪上白雲終日閒歷歷舊遊如  
在眼只餘幽夢到青山

羣山滴翠雨初收渡口無人灌木稠茅屋數間門

自掩桃花深處有行舟

一線飛泉如髮直兩崖山色似眉青箇中清興真  
難負更欲憑高置草亭

旅壁讀阮亭渡易水詩且述牧齋西樵句

感賦

荆卿負奇氣寄跡屠沽流燕丹困無道罄折思報  
仇殺馬復殺妾於勢不可留高步入秦庭四顧誰  
與儔渺渺秦武陽倒提血髑髏圖窮祖龍走不中  
實已羞豈云劍術疎促迫敗良謀所以高漸離擊  
筑睢兩眸終始雪一恥惟勇以義酬而彼二孺子

亦各成千秋悲風何蕭蕭落日明古丘從來燕市  
上寂寞酒人遊

讀顧文饒洞庭龍女詩戲題其後

鬼神偏亦解相思貝闕春愁十二時不信柳郎成  
底事虎頭端的爲情癡

送舒康伯南還

杯酒論文後忘年交益親三春隨杖履一別在河  
濱天地愁征馬鶯花送故人旗亭莫歌鳳鄭重百  
年身

馬上望戒壇次耦長韻

白雲滿山誰打鐘馬首西來路不逢即此相看如  
一夢因緣還欠戒壇松

榴花

觸熱愁驚眼偏多爛熳舒亂煙裁細葉新火照叢  
書未了紅裙妬空將綠鬢疎風前渾豔盡過雨更  
何如

殘榴

繁花迷赤日結子待清霜涼燠知生苦枯榮動客  
傷勢低餘鳥啄葉瘦亂蟲藏眼見秋風勁累累歷  
短牆

臘月十六日過南城留飲

月減一分明春先兩日晴市喧秧鼓競花暖鹿裘  
輕檢點歲時樂徘徊京洛情衝泥莫辭遠歸路故  
人迎

宿金氏園亭

殘宵舒短夢歷歷紀遊踪忽警北窗雨滿疑東澗  
龍香清知滅火曉動欲聞鐘蕭散人間意孤雲第  
幾峰

喜吳調玉至

晴光千里至南嚮發愁思豈必停車客先期繞柱

時將鬚驚貌改把信說梅遲一醉真無意千山雪  
正披

憶芥公上人二首

忽憶山窗下殷勤禮白雲妙香飛宿雨貝葉展斜  
曛一掃真空見三皈世願分無由汲銅井重與淨  
埃氛

徙倚隨吾意行吟此病身寒花皆自笑饑鶩漫多  
嗔天闊雲難住樓高月易鄰算來強食是何處有  
閒人

期葉桐初不至

松江言集卷之二  
三  
聞道兼程至齊山一片深世寬由客嬾詩苦向誰  
吟索寞過花市因循卧竹林不憂吾道在攬取百  
年心

哭陳其年檢討

百年重五恨一夕上元遊豈合人間住多應天上  
留玉簫寒倚月楊柳暮侵樓得似遼東崔重來弔  
故丘

見雁懷馬伯和

苦憶白眉叟頻來送我歸空江停去棹老淚落吾  
衣半醉憐攜鐻長歌羨采薇忍看霜後雁日日向

南飛

春日軒下種秋花

昨宵微雨好溼透軒東隅曉起得晴光把鍤下堦  
除下堦淡無言獨自理荒蕪不惜筋力勞但恐時  
節殊地靜室已幽況值人事無人生愜所好隨處  
有良圖春懷勤草木亦不爲陋愚乃有數種花不  
與時令俱趁茲長養力他日堪自娛細種隨手下  
幾日生根鬚敷榮有遲速雨露同所濡氣感花性  
生土暖花身蘇轉眼見顏色預使心中愉西園別  
已久南望常嗟吁



放愁詩

哀茲渺身包羅百憂膏煎木寇日月水流我告昊天姑爲放愁天淨如鏡明含萬蠹仰呼不應口枯舌窘摩撫劬勞泣涕星隕五臟六腑瘡痍未補芒刺滿腹荼蘼毒苦反照四顧覓愁何所南山有松脊令于飛我今褰裳采藿采薇白髮坐堂綠髮立堦良食衍爾含飴哺孩手足輯睦琴瑟靜偕千春相保咫尺莫乖豐穫勤耨饘粥偃僂偶有旨酒爰念好友二簋相享薄醉攜手俯察濠梁傍嗤芻狗騎馬食肉轉背枯骨仙人羨門披葉

跨鹿菖蒲紫茸金丹紅熟飽食生翼風雷捧足抱  
一以終返魂于屋千年萬年愁不敢出

棟亭留別

客至皆題棟從今有棟亭難將一掬淚灑作萬年  
青夕霧收全幔寒山掩半屏悠悠後來者材否念  
居傳

夜雨和葉桐初

血淚一秋陰西風共此心寒缸荒署滿秋蠟夜堂  
深江海皆無限家山不易尋還傷投分友空作望

晴吟

桐初作望晴  
詩期于返也

送袁士旦遊吳下二首

蕭颯西河樹誰爲感舊人多君真世德  
藁爾總埃塵服古才難細諳時句易陳  
但能舒醉眼鍾阜尚嶙峋

一笑神州路皇皇九旅寒何如晚簷臥  
贏得早梅看盤飮初敍栗袍綈再練紈  
五湖歸亦好雜還馬曹官

雪霽

漫漫誰復辨茅茨內外皆寒鳥起遲  
小苑調駒宜此日頽城倚杖亦多時  
銅龍飛去鍾猶吼玉筍排

來山自知何意東風偏澹蕩不教一片接燕支

自潤州至吳門行將北歸杜些山程令彰  
作詩見寄奉和二首

遲客能無酒長遊不出吳風濤宜此世花鳥合爲  
區劃指千人和浮香一榜孤向來真草率白恰漫  
江湖

莽莽開帆雨初殘見月生山前無定宅篋裏盡長  
城活火諳泉味清眠稱櫓聲蓴羹吾豈厭未擬換  
桃笙

出隱園小亭復題一首

客行不待主從容  
日落天寧寺裏鐘  
獨下茅亭呼款段  
薦蘿纏死一株松

聞蛩感題二首

荒衙敗砌啼相伴  
船裏青苔又一秋  
怪爾涼蟲心不死  
黃河直北是幽州

棟亭落葉無人掃  
八月西風孤枕中  
我亦何心說飄泊  
苦吟須讓不凡蟲

青杏汎梅有感之作三首

憶花愛果大凡情  
頻念爲兒遶樹行  
此日望中疑濺齒  
可憐酸苦未分明

梅酸杏苦春來味北果南花勢不同慰眼遽勞生

摘取妬饒朱老喫吳中

謂樸仙

昔思爲酪滯江煙何限青丸觸馬鞭任願盲風移  
瘠土儘教甘雨借肥天

西堂集諸同人限薰風南來四字四首

江湖方浩蕩今昔幾同羣願客常如夏綠堦草正  
薰卑栖非異俗列坐盡能文衡宇偕攜手低徊問  
白雲

萬事看舒卷情親在眼中喜沾鸛鳩雨笑逐馬牛  
風項領期成子提沾近約僮歡場誰最健實有鹿

皮翁

野靄投深幔天街少過驂羽林嚴極北甲第徧城南涼借幽并氣清兼梵唄譚紛紛落麈尾髮短不須簪

謾許投壺賦還憐草檄才終成過鄴去絕勝渡江來東里聞吹竹輕颺激落梅絺衣共清露月上黃金臺

微雨窗蕉綠甚漫成二首

塵埃更比暑難消休沐初欣雨灑朝一日不聞車轂響世間何物綠如蕉

矮窗支睡有藤輪梅憶茶村五字真

茶村寄梅葉詩未和萬卉

看來紅盡假離披大葉好遮身

和吳雪篷塞上四無詩

北陸瞻晴昊臨風客思違食鹽通邑貴嚼蕊度春  
稀阜蓋能無事菟裘胡不歸遙憐標驛使堅卧瑾  
衙扉

梅

旅寄何辭陋邊隅豈不荒俗容三月弔檄敕萬夫  
長慎莫彈荆棘饑須問鳳凰筇枝猶在握期爾寸  
心涼

竹

長日書遮眼論斤百弓留幾曾經手觸安用等身



求沙軟調鞍馬風高拓戎樓周旋方載橐不必借

荊州書

蒸露金遺法間關盡麪車地寒偏擇酒壇裏不垂  
魚餽粥加餐穩粉榆入社虛層霄勞悵盼白眼近  
何如酒

汪上若程勁飛過訪野航自天津初歸  
行處津初問滄州百里間舊聞徒旅笑歸遂耦耕  
閒假牒頻消晝仙舟不繫山屬杯塵近遠捷徑許  
重攀

送鮑子韶赴粵東將軍幕

尉陀朝漢古臺荒圖版咸收異姓王內府剖符防  
瘴徼叅軍倚馬有輝光時平筆卧珊瑚格海近家  
移玳瑁梁十萬健兒爭識得金盤長跪獻檳榔

子猷摘諸葛菜感題二捷句

春闌青紫漫牆隅蔓菁敷花味始腴忽念南中桑  
葉長錯將蕙苾謗明珠

譜疏相因舊不差情親小摘慰年華長安近日多  
蒲草處處真花似假花

哭醉行

爲蘿山哭  
勁飛作

醉後歌薤露降讖曰不祥枯目睨飲器放誕爲佯

狂逆情過禮神中傷貍首之斑安可方憐生捐死  
不旋踵何以解憂惟杜康人言醉與冥理會又言  
哭爲死者忌君不見長風烈烈吹繡被寂寞忍欺  
泉下睡我愛汪倫篤友誼蓬頭瀉淚驚羣兒失聲  
不怕犯日將強飲一日嗟庸誰抱病不能救聞之  
不下咽長歌聊當哭古義人所羨皇皇東方星吳  
檣亂如薺鋸檣作榔眠幾人長安遊客大可畏

病中冲谷四兄寄詩相慰信筆奉荅兼感

兩亡兄四首

頻拈柔翰憐生事枉憶茅齋款段留漫興詩篇餘

競病傷心粉澡雜俳優棗梨歡聲頭將雪身世悲

深麥亦秋往往人羣避僚友就中惟感賦登樓

謂王

子千

京華重歎僦居難來往須期把臂歡爲吏何妨知

米價吾宗自古占騷壇蘋婆華卸看青果

大兄有蘋婆書院

湏水魚枯好擲竿滿眼風雲堪慰老要盟應任白

鷗寒

時兄欲棄業不就

卧病經旬初出戶戰餘寒熱體差強華編喜挹松

窗綠情思遙分蕉緒黃自怪書空恒咄咄古來筆

陣見堂堂中宵獨立慙存荅猶恐將身入混茫

藥囊檢紙題緘處走電驚雷破柱時拭我細斑湘  
女竹乞君青草杜陵詩終期磈地無離別竟欲逃  
禪絕喜悲何日對牀聽漉酒疎花零葉遶東籬

並寄

松雪翁字及青  
藤山人蕉圖

### 熱甚潘雪帆見枉

炎沙擁足休轅馬嘲熱人來字雪帆行欲惱天餘  
敗笠情疑策地祇單衫因循河朔期難定久愛山  
陰興不凡何處冷風堪解帶甘同白首寄蒼崑

### 禹尚基卜居圖索題

鱸魚蓴菜江鄉近楓葉蘆花水國遙風景最宜虛

結想畫圖時得笑相招三分茅屋愁靈雨七尺漁竿待晚潮恰與王孫較長短荷衣箬笠見丰標

西村師教子導引却病戲成二詩時師將

歸清涼

曠澤張翥逐獸蹄華軒閉置儼寒鷄

即河

清閒是

病醫無藥羸秀何能仙漫躋通夜琴心三疊舞中年函谷一丸泥思量飽喫桃花飯也待黃梁熟幾稊

堂策蕭蕭一衲溫魚山清梵許同論宦情真比銜書鹿世事渾如接手猿頭沒杯中方大笑身棲爨

下久無言晴洲曝嘴城張錦蠟屐經春憶後園